



鳳筆記卷之十七

安南傳一

海虞文臺黃美中校

安南古交阯秦并天下益斥南荒服置桂林南海象郡秦亡南海尉趙佗起兵擊捕叛者稍稍易置故守今王之至其孫亡而漢因爲置九郡安南其一也光武時女子徵側徵貳反將軍援討平之立銅柱界後漢置交州又爲交阯郡至隋文帝平陳廢郡置州煬帝更置郡唐武德中

為交州總管府至德中改安南都護府唐亡曲承美者土豪也據其地稱節度使而絕不通嶺表劉隱攻執之以其將楊延藝為節度使延藝卒子紹洪嗣洪紹卒州將吳昌岌起而代昌岌卒弟昌文嗣昌文殘虐不有衆迨卒而其偏將吳處坪矯知護楊暉杜景碩爭立管內俱亂起驩州刺史丁部領勇善戰率兵悉逐捕亂者遂自稱大勝王三年傳位子璉璉立七年而宋師平嶺表乃使使貢方物求內附詔授安南都護

進封交阯郡王貢歲歲不絕太宗時部領老死亡何璉亦死弟璿嗣尚幼牙將黎桓拉權錮璿蠶食其族而代為節度使事聞太宗怒發兵步騎自邕人舟師自廣入進其境咸敗歸帥坐軍法抵罪而桓歲使使來謝罪求封上春秋高稍厭兵而桓請無已貢物盛許之授安南都護進封交阯郡王桓雖詳為服中國者而兵郡邑寇盜剽民居廩食子女萬計詔切責之桓即謝罪真宗立進封南平王尋卒子龍鉞立未封為弟

龍廷所殺即封龍廷為交趾郡王改名曰至忠
復為大將李公蘊所殺請封封公蘊如至忠進
封南平王卒子德政嗣卒子日尊寇斂邕諸州
安撫使余靖發兵與占城合而夾攻之乃上表
謝為罷兵尋擊虜占城王僭稱帝國中天子固
知之分莫較也卒子乾德嗣卒子陽煥嗣陽煥
卒子天祚嗣乾德故側室子奔大理以其兵內
不果孝宗朝進封安南國王卒子龍韜嗣卒子
吳崑嗣謝表不至輟加恩云卒亡子以女昭聖

主國事遂為子夫陳日照所有日照故福州長
樂人謝升卿也識書美姿貌而落拓不事家人
產殺人變姓名之安南見國相會應試居首而
王女從窓隙窺而悅因歸之有安南政封國王
時元已破蜀輕兵下大理而使使招之日照未
昇強大狀下使獄破竹束體入而縛之元將怒
率精騎日夜馳抵境大破其中守兵乘勝圍國都
日照跳匿海島元盡焚其宮廟發藏貲屠戮其
人而反日照還不得意奏於宋請傳位子威晃

宋授威冕國王而尊為大王元既滅宋威冕惧
易名光昺請降元即故封授之尋卒子日烜嗣
元所以督攝安南甚苦歲責供巨億不可支而
復設達魯花赤參其國事日烜意惡未決會元
伐占城假道因發兵拒不前而元鎮南王急擊
大破之復追破國都日烜走清化其弟益稷降
元即拜為安南國王乂之暘暑選師其後軍為
日烜所迫多敗死者乂之鎮南王復來伐入國
都已而返元兵凡三破國殺獲幾十萬然終不

可久而日烜亦進代身金人贖罪詔止不伐日
烜卒子日燇嗣日燇卒子日套嗣日套卒子日
燿嗣日燿卒子日焯嗣日焯卒子日燿嗣為貢
歲不乏然元亦取羈縻而已無所望之

大明洪武二年 高皇帝既已北定元遣詔諭
海外諸國而世子日燿遣其少中大夫同時敏
政大夫段悌黎安世等來朝貢方物因請封爵
六月抵應天詔遣翰林侍讀學士張以寧典簿
牛諒徃使其國封日燿為安南國王塗金銀印

龜紐詔畧曰咨尔安南國王陳日燿惟乃祖乃
父昔奠茲南土傳之子孫世世克恭臣職以永
世祿朕荷天地之靈肅清夷夏頃以書往報冀
咸享安樂而尔首奉表來賀睠茲勤意深可嘉
尚是用冊爾為安南國王爾尚益茂令猷永為
藩輔欽哉別賜大統曆一織金文綺紗羅四十
使者人文綺一羅一紗二以寧等十月抵國界
而日燿等以下五月先卒弟日燧嗣遣大夫阮
汝亮來迎請詔印以寧不可乃復遣杜舜卿等

請命先是占城舊廢役安南歲有貢頗苦督迫
而勢漸以益強遂與安南抗日燿數遣兵擊侵
敗之於是占城王遣平章蒲旦蔴都等告急乞
援兵冬十二月壬戌明翰林編脩羅復仁禮部
主事張福持詔兩解俱罷兵復仁還奏安南王
贈遺使者黃金吉貝布不受上嘉之而加賜其
國使人遷復仁等官是歲明中書省禮部臣言
安南高麗既內附國山川宜有祭詔曰可而安
南山二十一日佛跡曰徹圍曰武寧曰先游曰

普賴曰萬劫曰傑特曰安子曰地觀曰天養曰
神頭曰龍岱曰文塲曰安復曰卞曰立石曰香
象曰崇曰都隆曰測曰分江六曰川盧曰富良
曰天黃曰大歷曰蘇歷曰三帶水六安石淵曰
石龍門曰茲廉曰浪泊曰越裳宛曰九德宛俱
載祀典三年四月安南使杜舜卿等以王日隆
卒來告哀請命上素服御西華門見遣翰林編
脩王廉往祭尋遣吏部主事林唐臣持詔封日
燧爲安南國王四年二月侍講學士以寧編修

廉吏部主事唐臣還自安南王日燧遣阮汝亮
表謝恩獻方物以寧卒於道是歲冬日燧兄叔
明殺日燧自立五年二月遣陪臣阮汝霖來朝
貢馴象禮部已受表將入見主事曾魯取表副
視之曰前王陳日燧今叔明何也白尚書詰使
者得其故奏上上怒曰島夷何狡獪如此却不
受六年正月叔明更遣使譚應昂等奉表謝罪
貢方物請封應昂爲叔明言日燧寔病死叔明
遜於野國人請立之上曰日燧死爾國人當爲

服叔明且以前王印視事俟能填撫人民恭順無闕史議之仍賜應昂等紗羅有差七年三月遣正大夫阮時中陳謝貢方物且自稱年老授政弟熾許之叔明雖已授熾政然實自專制八年熾來貢九年復遣通議大夫黎亞夫來貢詔以其太數止之十年賜陳熾上尊文綺既至熾已死叔明更署弟煒代國事十一年遣使謝恩貢馴象方物且來告熾喪詔賜煒文綺紗羅中使陳能吊祭熾十二年二月禮部尚書朱夢炎

奏定遣使安南相見禮凡使者抵境先報王遣人郊迎設香案王府正堂龍亭置公館王率寮屬至館具鼓吹身前導使者從至王府使者立龍亭左王與僚屬就位行五拜三叩頭禮使者與抗禮居左王居右時安南占城雖以詔故陽罷兵而安南疆吏爲寇剽占城不已上詔責叔明畧曰書不云乎毋爲亂首尔國與占城構兵十餘年朕未覩是非所在然以社稷爲博剽椎焚遺男女不得耕織朕兼愛海外元元甚愍之

往者以詔諭爾等使寢戈紆忿爾寔不奉詔陽
解陰搆毋乃首亂違書戒哉春秋列侯國無慮
百數相繼進滅無他背君好戰二者已耳爾其
鑒之二十年九月明皇帝萬壽節煒遣使獻誕
馬三十詔答幣帛有差久之德明卒二十一年
陳煒爲國相黎一元幽城外大陽坊十二月殺
之立德明子日焜立國事一元德明婿也一名
季犛二十六年明詔安南國殺君不道絕朝貢
廣西都指揮使司布政使司毋得納使者至三

十九年正月日焜始以德明喪來告上謂禮部
臣曰叔明弒日燧而有其國今一元又弒陳煒
矣更吊慰之是與亂賊厚也勿許時日焜又遣
兵取思明府地三十年正月明遣行人陳誠呂
讓諭還地久不決誠讓貽書日焜使者不佞辱
主上明命久未決無以復主上也使者今援古
證今拆利鬪害以告執事在後漢時徵側叛馬
援討夷之立銅柱經内外界唐虞五管之一宋
始自樹然乾德寇邊郭逵討之擒僞太子洪真

乾德俱而割廣源門州思浪蘇茂桄榔之地降
元初有天下尔先王光炳首稱臣脩貢迨日
烜嗣改操於是世祖來討尔日烜蒙荆棘甯島
浮舶城郭宗社人民幾盡日燁鑿前之失祈命
於元且曰向者天使辱臨小國迎送止祿州惧
冒侵越之罪不敢過丘温也則是丘温以北地
不在爾國明矣今爾國迺越淵脫踰如熬慶遠
而盡有之將乘元末亂假隙僥倖而得之耶行
久下車之日王之君臣皆曰此地故屬安南不

言所以始也無乃爲大言誑我耶抑王惧以侵
地得罪強自飾耶主上神聖不計王前罪乃計
王飾罪耳其熟圖之日烜復書辨不已且遺誠
等黃金二錠白金四錠沉檀香百斤誠等却之
日烜曰贖也陸賈昔受之何辭誠曰尉佗以彈
丸黑子地與疆漢抗是賈禍也陸賈受重賂分
諸子是賈利也王以尉佗自處因耳乃欲陸賈
我乎日焜無以難更咨戶部曰伏見上司爲思
明府奏侵占地遣行人陳誠呂讓至下國令還

之下國竊惟丘温如熬慶淵脫五縣自昔供輸
下國賦役世世無爽而洞登乃淵縣之地天使
往來之路其思明府憑祥人每歲與下國淵縣
人交割夫騎於憑祥界坡羅唯關今思明人乃
謂下國於其地洞登立站侵占何戾也夫立站
者意以畧得其地耶地舊屬我又何俟圖夫所
以建室舍者蓋上司有把截過界之命稍戢使
吏宿耳已乃復撤何預於侵又謂元時大軍二
次捕交回軍設永平寨置軍填責發交人助糧

餉竊效元師二次來伐多不利歸史雖諱不詳
然至鎮南王則曰王在內傍關賊兵大集以遏
歸師王遂由卑巴縣趨孟州間道出觀此則軍
勢可知歸路覓辦豈有回軍永平而設寨以守
又責交人助糧餉者哉又謂下國越過銅柱二
百余里侵占其所屬丘温等五縣者計銅柱初
立時至今一千二百五十餘年陵谷遷變誰復
能辦又謂拘問老人黃伯顏供說云說云者伯
顏亦思明人豈不同其欲雖千伯顏將何信耶

又謂因前王官失於申明作夔牧職畫器具呈
及以建武誌爲說者豈有廣成之高曾祖父不
識古事識古事乃在廣成耶下國與思明接境
思明之人徃徃侵占下國田土殺掠人民牛畜
下國僻在荒裔無所告愬思明狃小獲乃啗大
利而誣至此下國固畏罪自反不暇何敢有侵
占哉夫苟有侵占豈難退還今不侵占何以退
還此五縣乃下國世世相傳所守之地必不敢
付之思明惟 聖天子一視同仁與天地同德

故下國以此自恃而敢傾心陳懇焉敢逃罪誠
等還上召群臣議或以其抗命當討上曰蠻夷
相爭古有之彼恃頑不服當取禍耳毋動乂之
國相季犁復弒日焜而立其子胡登自稱曰太
上皇明建文君即位使使者來朝貢方物五年
太宗皇帝自燕起遣詔諭安南諸國永樂元年
胡登遣使賀即位別貢方物其辭曰昔我前王
日燿首倡群服輸嚮先帝先帝是以嘉惠下國
貢賜之使絡繹南北無絕不幸日燿死喪支庶

零洗無可嗣者臣胡查不佞以陳氏甥爲衆推
迫理國事且四年矣徼幸聖化四疆謐宇家頗
人給然未蒙一位號無以供事上及主祀率下
也天朝幸哀憐之下表禮部議安南絕遠多詐
難信宜遣使廉察之詔可是月行人楊渤等持
節諭其陪臣耆老曰得胡查奏欲就封者果陳
氏甥否陳氏得無絕否尔國人誠欲戴之否得
別有篡殺之故否其悉心以答毋誑秋八月分
賜諸蕃王文綺紗羅諸物安南以行人呂讓

智往十二月行人楊渤還以耆老臣衆表上與
查表合遂許封是月禮部郎中夏止善往封胡
查安南國王二年六月遣使者奉表謝恩詔還
思明府侵地八月更勅安南王胡查曰邇者占
城奏尔攻掠彼地剽人畜蕩廬舍又邀奪貢道
逼與冠服印章使臣屬甚非遵奉一統之義思
明府臣來言尔奪其西平祿州永平寨此中國
疆土也爾何得擅取之不爰必討無赦是月安
南故臣裴伯耆詣闕告急曰臣事陳氏祖父皆

執政大夫女又親屬也臣故少得左右陳王既長爲武節侯陳渴真裨將統兵填東海三十二年臣代渴真將而奸臣黎季犛弑主篡位屠戮勳賢族者無慮百數臣聞變勢不能抗弃軍遁海島附番舶得此至臣兄弟妻子肉季犛之几久矣季犛乃故經畧使國耄子世任心膂叨竊榮寵子蒼亦貴仕也一旦得志遂覆陳宗擅易姓名曰胡一元子蒼曰胡登僞號改元大造無道陛下念陳氏忠順之跡憫此無告遄施吊代

臣得負努前驅膏血草野以報陳氏足也上令有司給衣食踰數日而老搃宣慰使緣歹護前安南王陳天平來朝奏曰臣故安南王烜裔孫也先王奉事大國無敢虧傳至臣煒賊臣黎計犛當國擅作威福臣時稍裁抑之便反刃向瞻而立其子顥顥即日焜也亡何更弑顥而立其子家尚在襁褓中更弑之而自立其子蒼爲大虞皇帝臣先被黜在外僅得免他子孫近者誅夷盡矣臣方欲集兵計恢復而季犛猝來掩倉

皇出鋒鏑問道抵老撾始得覩闕廷也夫興滅
繼絕陛下之大恩也陳氏之遺燼得少燃者臣
之大幸也上引見賜第居與裴伯耆處十二月
安南賀正旦使者至上出天平示之使者識故
王孫也錯愕下拜至流涕而裴伯耆以大義責
之不能對三年正月遣監察御史李椅行人王
樞切責安南國王登令其實首罪安南兵寇明
寧遠州掠吏士數百去五月安南王登遣使
臣阮景真等隨謝罪曰臣父子實陳氏甥以彼

宗族喪亡無可繼者故國人舉而屬臣耳臣飾
賦率妻子躬力作奉上國之不暇疇敢抗天平
其裔孫臣請歸而事之臣得完首領足矣祿州
諸寨地已退還臣俯伏俟命誅之宥之惟 陛
下大度于是 上悅遣行人聶聰往為約十一
月聰還胡登附表謝仍迎天平上於是勅廣西
副總兵黃中呂毅將兵五千送天平歸國封胡
登順化郡公盡食所屬州縣天平陛辭賜羅綺
鈔甚厚四年一月中毅以兵送天平至丘温登

遣陪臣黃晦卿等候廩餼及牛酒犒師晦卿及諸從者見天平皆拜舞欣躍中間晦卿不至何也曰登踴躍俟命而天使儼然辱臨之敢不至第不有幸霜露之疾匍匐前道以俟中遣騎覘之無所見而迎者壺漿續於路遂前度隘留鷄陵折芹站山路險峻林木蒙密軍行不得成忽大呼伏發劫天平鼓噪振山谷且十餘萬人中等亟整兵擊之橋已斷賊遙拜且曰遠夷何敢勞王師天平實踈遠小人眩 聖聽欲滅我

胡氏我幸得殺之以謝 天子中等歸上狀天子大怒遂決意興師討安南成國公朱能新城侯張輔請行許之仍勅雲南總兵西寧侯沐晟練甲士以蜀兵八萬益之七月戊子朔祭嶽鎮海瀆神以出師告辛卯命成國公能為征夷將軍西平侯晟為左副將軍新城侯輔為右副將軍豐城侯李彬為左叅將雲陽侯陳旭為右叅將兵部尚書陳洽叅贊軍事都指揮同知程寬指揮僉事朱能等為神機將軍都指揮同知

毛八丹朱廣指揮僉事王恕等爲游擊將軍都
指揮同知魯麟王玉指揮使商鵬等爲橫海將
軍都督僉事呂毅都指揮同知朱吳江浩僉事
方政等爲鷹揚將軍都指揮朱榮金銘吳旺指
揮劉塔等爲驍騎將軍發京衛浙江湖廣二廣
雲貴四川諸衛步騎舟師及土舍達官奔命共
八十萬人討安南能輔兵由廣西憑祥進兵入
坡壘鷄陵度富良江中路入晟兵由雲南路入
別勅占城王巴的賴以國兵擾其境十月戎國

公能卒於軍輔爲征夷將軍是月將軍輔發憑
祥渡坡壘關令都督同知韓觀以廣西兵運餉
修道伐木繕橋梁出游兵偵賊鷹揚將軍毅等
前哨攻隘留關取之敗賊三萬衆留兵守輔移
檄數季犛父子二十罪度關軍容整肅秋毫無
犯民悅降者相繼驃綺將軍榮等取鷄陵關復
敗賊三萬衆得軍資器械無筭次日輔度鷄陵
謀芹站兩傍皆有伏遣呂毅黃中以兵搜捕之
賊逃遂哨昌江市造浮橋築堡遣方政王恕哨

探直抵富良江北而大軍自芹站西折至新福
遣驃騎榮往約沐晟同進三帶州僞僉都鄧原
南策人莫遠莫遠等來見輔言賊恃僞東西都
及宣洮洩富良海潮希麻牢諸江自固緣江樹
柵築土城縣亘九百餘里盡發諸府州縣民二
百萬守之又於富良江南崖置椿水中盡取戰
艦列椿內都守備嚴時列象馬陣凡水陸號七
百萬我師自新福移營三帶州造舟圖進取十
二月副將軍晟奪宣江而軍次洮江北岸與多

邦城對壘將軍輔遣叅將陳旭會晟濟師驃騎
榮等大破賊於嘉林江將軍輔留都督高士文
舟師與朱榮應而自率大兵與副將軍合沿江
柵皆逼水不可上惟多邦城下沙坦可駐師而
賊設備密下設重壕壕內外布箐刺輔處分部
定夜四鼓遣都督黃中等啣枚舁攻其過重壕
至西南城下以雲梯附城都指揮蔡福先登衆
蟻趨上賊不支遂下師隨入賊又城內巷戰驅
象前輔以畫獅蒙馬神機砲翼而前象披靡走

賊大潰殺其師梁民獻蔡伯樂鹵獲人象無筭
賊奔西都走五年正月朔將軍輔晟等襲賊籌
江柵大破之又攻困收普賴二山萬劫江斬首
三萬七千餘級獲僞團副工部曲又敗賊胡杜
於盤灘江踰兩日輔等次魯江賊五百艘犯我
軍逆戰大敗之獲艨艟百艘殺其將阮子仁等
萬級擒黃世罔百餘人皆誅之遂窮追季稜父
子至悶海口地下濕不可駐乃詳爲還至鹹子
關令都督柳升守之賊果來躡輔回軍遇于富

良江賊舟亘十餘里又以精卒數萬趨陸來戰
輔與諸將奮擊大敗之斬僞翊衛將軍十餘萬
級江水爲赤乘勝追至悶海口季稜父子僅以
數小舟遁僞吏部尚書范見覽等降季稜等走
又安輔遣都督柳升前追之得舟三百永定衛
卒王柴胡等七人獨調得季稜所前格之縛送
升軍李保保等十人又擒季稜諸子於海口山
中次日土人武如卿等獲黎蒼等於永益海口
高望山安南平輔等露布獻俘闕下僞大虞國

上皇黎季犛偽大虞國主黎蒼偽推誠守正翊
贊弘化功臣云屯鎮兼歸化嘉興等鎮諸軍事
節度大使洮江管內觀察處置等使持節領東
路天長府路大都督府特進開府儀同三司入
內檢校左相國平章軍國事賜金魚袋上柱國
衛國大王黎澄偽大原鎮兼天開鎮驃騎上將
梁國王黎 偽新安鎮驃騎大將軍新興郡王
黎 賊孫偽太子黎芮偽郡嗣王黎滿偽郡亞
王黎范幼孫五郎賊弟偽臨安鎮兼大安海鎮

驃騎將軍特進開府儀同三司入內相國平章
事賜金魚袋上柱國唐林郡王黎季貌賊姪偽
望江鎮輔國大將軍入內判中都督河陽郡亞
公黎原咎偽領龍興路都統府平陸縣上侯黎
子綽賊姪孫偽御輦一局正掌卿侯黎叔爌偽
清亭侯黎伯駿偽石塘卿侯黎廷燁偽永祿高
侯黎廷燿賊將偽入內僉聞朝政兼內侍省都
知知左班事諒山鎮推僉行軍行諒江路同知
總管府事賜金魚袋柱國東山卿侯胡杜偽入

內行遣同知尚書左司事樞密院副使阮光僞
正奉大夫入內行遣門下左諫議大夫同中書
公事兼三江路大守新安鎮制置使國子學祭
酒賜金魚袋護軍黎景琦僞寧衛大將軍知威
衛管左登翊軍賜金團符縣伯段輦僞神勁營
高伯陳湯夢僞鈎鈐衛中郎將領龍捷軍兼領
壯勇營范六材凡二十五人上御正殿面詰季
犛父子頓首請死下之獄先是上勅輔訪求陳
氏後封之輔上言陳氏已絕無可繼者乞郡縣

其地詔可立交趾都指揮使司以呂毅黃中掌
之布政按察二司以尚書黃福兼掌之前工部
侍郎張顯宗等為布政使以下官有差前來歸
附裴伯耆為按察副使凡交州北江諒江三江
建平新安建昌奉化清化鎮蠻諒山新平演州
又安順化府十五衛十千戶所二州四十一縣
二百八十地東西相距一千七百六十里南北
相距二千八百里安撫人民三百二十一萬有
奇獲蠻人二百八萬七千有奇糧一千三百六

十萬碩象馬牛合二十三萬五千九百有餘舟
八千六百七十七艘兵器二百五十三萬九千
八百五十二立制詔太宰大司馬新城侯輔功
最大西平侯晟次之其進封輔英國公晟黔國
公賜金幣冠服晟殺十之一都督升封安遠伯
黃中呂毅得贖罪餘手捕黎季犁及蒼者授三
品官有差

鳳洲筆記卷之十七

鳳洲筆記卷之十八

海虞文臺黃美中校

安南傳二

簡定者陳氏故臣也不肯事黎季犁而輕騎跳
歸明既從下安南爲別將頗有功矣定知上雅
不欲復隍氏後還待命頗與故所親陳希葛約
竄行至興化州說群盜鄧悉等下之聚衆至萬
餘益南合慈威蠻行剽下大堂應平石宮諸州
邑勢轉盛遂自稱大越上皇改元興慶陳希葛

為太保郡公八月鎮守尚書黃福來告急上命
發郡邑兵四萬征南將軍黔國公晟討之兵部
尚書劉儵贊軍詔降者待以不死十二月黔國
公與簡定戰於生歟江敗績都督呂毅尚書劉
儵左叅政劉昱皆死之上怒七年大發兵復拜
英國公輔為征夷將軍黔國公晟為副將軍八
月大破賊於鹹子關獲舟四百艘尋又敗賊盧
渡江又敗之於太平海口賊帥鄧景異獨身奔
陳季擴季擴者蠻人奸黠自云陳王後也安南

民不忍弃陳王則相率歸季擴別據地稍遠明
兵而明兵悉窮追簡定至演州分晟兵從磊江
南都督朱榮舟師從江中行抵牛鼻關輔自率
騎卒趨地冊合美良簡定望見震恐潛行之民
家弃馬走吉利柵深山內大索捕執定并其將
相陳希葛阮汝勵等送京師磔於市八年正月
英公國逐捕其黨阮師檜於東潮州斬首伍千
級獲偽將軍范支陳原卿等二千人悉阮之築
尸為京觀是月天子勞苦征夷將軍又暴師役

召還朝於是英國公上言簡定固伏誅而陳季擴及其部陳原樽阮師胡具鄧景異鄧鏞潘季祐各率兵掎角相援未即下演州清化諸鎮通被殘而又塞神投福成江口道請多留兵付沐晟期盡賊乃已詔曰善其以征夷將軍麾下益晟五月晟進擊破季擴等於靈長海口斬首三千十一月季擴使使上表請降詔以爲交陟布政使陳原樽阮師胡具鄧景異爲都指揮潘季祐爲按察副使趣之任然季擴實詐言緩師兵

耳不復肯之任而掠如故詔英國公復往會計之破賊於月常江殺溺者一二萬十年八月復大破賊於神投海擒僞翊衛大將軍鄧汝戲等數千人悉磔之十月其少保潘季祐遁可雷山乞降輔承制季祐以按察副使理又安而其將帥陳敏阮士勤等相繼降矣十一年十二月英國公輔等復大破賊於愛子江昆傳山蹂躪其象陣斬僞少尉阮山等十二年五月獲季擴及其太傅阮師等送京師戮於市行賞宴南征將

士賜英國公輔黔國公晟金五百鈔二萬錠帛
絹各五十餘有差亡何黎季犛釋自獄克戍廣
西而季犛子蒼澄各以善兵器用累官俱至工
部尚書爲別賜姓也豐城侯李彬以將軍填交
趾定歲貢扇萬把翠羽萬箇十六年正月豐城
侯上言清化巡檢黎利叛利故王季擴臣也善
戰挾計數爲金吾將軍來降授巡檢而因人心
不大德明故遂反行剽郡邑自稱平定王拜弟
石相國段莽都督豐城侯使叅將朱廣等討捕

頗獲首六百餘而利剽如故十八年四月左叅
政馮貴右叅政侯保與戰俱敗績死之二十二
年七月仁宗皇帝即位中遣官山壽諭降授靖
化守是月都指揮陳忠敗死利攻茶籠郡守琴
彭堅守不下洪熙元年七月 宣宗皇帝即位
詔叅將陳智發兵救之智逗遛不即救茶籠潰
琴彭戰死時宣化嘉興等賊周文莊等合雲南
寧遠州紅衣賊出劫掠勢盛甚皆遙受利度節
宣德元年二月叅將智與都督方政等進擊利

於茶籠州大敗歸四月太子太保成山侯王通
為征夷將軍都督馬瑛為叅將發步騎十餘萬
討利尚書陳洽叅軍事陳智方政削官爵白衣
隸軍中自效九月以廣西兵五千益王通十月
黎利弟善據廣威州都指揮袁亮指揮王冕司
廣陶森輔等禦賊偽為敗者走亮追之渡河伏
發亮被執森輔歿吏士陷者五百餘冕廣僅以
餘兵歸坐失陷大將徵十一月黎善衆數十萬
來攻交趾城分三道俱拒却之成山侯通於是

悉兵出擊善叅將瑛別率兵大破賊於清威至
石室合通俱抵應天駐寧橋諸將言地險惡多
伏宜遠斥堠持重擇便通不從麾衆渡天雨且
泥濘人馬蒲伏不成列而伏群起衝盪軍遂大
壞散死者二三萬人尚書洽亦與焉黎利時在
又安聞之自以精兵來會圍東關通敗後氣沮
陰遣人許為利乞封而檄清化迤南地歸黎氏
其吏民悉出城赴關獨清化守羅通謂指揮何
忠曰吾守此數賊恨深矣出賊尾而掩之必覆

元帥非君命而欲賣城賊乎不可連與賊戰敗
之十二月成山侯通來告急以太子太傅安遠
侯柳升為征虜副將軍保定伯梁銘又副之都
督崔聚為叅將九步騎七萬人太傅黔國公晟
為征南副將軍興安伯徐亨新寧伯譚忠為左
右副將軍發滇爨兵討師行遣太子少保兵部
尚書李慶叅軍事二年二月黎利來攻城急而
成山侯日夜訓精兵伍千出不意猝擊利大破
之斬其司空丁禮司徒黎豸太監黎秘諸太尉

少尉正督同督而下萬餘級利皇惧不能軍欲
走諸將請乘勝急追之而通猶豫不決賊得以
暇樹柵立寨掘壕塹脩器械四出攻掠未幾勢
復張三月圍丘温都指揮孫聚拒破之詔發四
川湖廣諸省兵四萬五千人益征南征虜兩將
軍四月利以八萬人破昌江中官馮智指揮劉
順知府劉子輔俱死之五月黎利來乞和成山
侯通等以聞九月九月安遠侯升等至交趾隘
留關黎利偽為其國人書詣軍門乞立陳氏後

升不啓封奏聞上而趣兵進破關隘大小數十
如無敵者升意殊易之抵鎮夷關保定伯銘尚
書慶俱坐瘴暑病寢劇禮部郎中史安主事陳
鏞言於慶曰主帥氣甚驕兵累日不得休固罷
矣而少斥堠不據險握重而欲急發卒如敵伏
何慶力疾以語升升唯唯抵倒馬坡獨以百騎
前渡橋橋壞陷泥淖伏兵起升中刃死是夕梁
銘以驚死李慶又死崔聚因宿將然倉卒不復
能約束吏士而吏士又新喪元帥沮且囂過昌

江賊率象陣來衝師遂潰聚與史安陳鏞俱被
執不屈死之七萬人無遺者成山侯謀知升敗
益懇更啗利請和弃交趾而教利行求得陳氏
它族高者僞立爲請上心憂南方事晨朝諸大
臣而顧英國公輔曰交趾柰何輔曰安遠成山
侯非將也而少發兵少發兵不足以制敵臣請
出保以一年擒利上嘿然退而召尚書義原吉
大學士士奇榮計兵力非能加太宗時也太宗
三下交中國士馬物故幾萬轉漕度支大小費

七十億得城三百餘而亡尺寸之利十餘年間
叛者四五起今縱或勝平利後竟非我有也乃
許之利奉表進代身金人及向所掠都督等萬
三千三百九十一人馬騾千二百疋成山侯輒
引還至京以擅矯制下獄當斬贖為庶人三年
五月行在禮部右侍郎李琦工部右侍郎羅汝
敬勘實還黎利使使言陳暲者正月病死無後
諸為陳氏後者悉絕臣利謹守封疆俟命詔更
遣汝敬往切責利俾更訪實以聞及索中國人

無隱是月利圍廣原州州將閔色新固守不下
四月汝敬還利附使貢方物且奏言陳氏子孫
實已盡嚮所喪吏士兵器家屬悉因成山侯師
還之矣臣利有女九歲於亂兵中失之後乃知
為中官馬騏進克官婢陛下幸旣已赦臣罪歸
此女臣銜戴恩德萬死無二六年五月利遣使
何栗等入貢兼請封六月遣行在禮部右侍郎
張敞右通政徐琦持詔利權署安南國事六年
二月利使阮文狗等附敞琦謝并貢金銀器皿

方物九年利卒子麟嗣麟卒子濬嗣亡何濬庶
長兄琮因會醜殺濬自立使來告哀乞封英宗
天順四年遣通政叅議尹旻給事中王豫持節
封琮而會王濬弟灝率衆討洙琮事聞詔停旻
豫行而以五年命翰林侍讀學士錢溥改授冊
灝初有國耻屈下欲殺所以見使臣禮溥七爲
書貽之往復甚苦乃定憲宗成化七年王灝侵
占城十七年復侵老撾來告急上諭之曰朕代
天理物不忍兩國橫罹兵禍其已之孝宗弘治

十一年皇太子出閣遣太子洗馬梁儲賜詔其
王使使隨入貢謝恩武宗立遣脩撰倫文叙等
賜詔正德十年其王暉復使使來貢方物十年
國相陳高等作亂弑暉國人立暉兄諱而暉率
衆擾掠山諸府地諱累有表貢及乞師討暉不
得達而會其部指揮莫登庸降諱登庸者蠻人
也勇而善戰繇武舉累遷隸暉以罪奔諱大喜
用爲宜陽叅將將而與陳暉戰大破殺暉還進
封川伯時國將鄭綏阮弘裕者世臣也坐爭權

不相睦罷歸登庸多齎遺金珪賂王諲所親信
文臣曰王知國所以弱乎在世臣植黨而市勝
王不若拔寒賤有大將畧者任之王諲遂任登
庸既已任則與所厚謀夜率兵逼圍王宮王諲
聞行得脫至清華嘉靖二年今皇帝遣編修孫
承恩等以即位告不得進而登庸遂立黎氏踈
屬庶爲王已相之易號令練兵積粟國人不復
曉黎氏矣尋娶庶母已又鳩殺庶而立已子方
芳瀛仍冒庶名氏僭號曰統元凡王諲兩遣使

來請兵俱為登庸篡取不得進亡何王諲卒世
子寧立結國人襲擊登庸大敗之登庸跳之海
陽據上洪下洪荆門南策太平諸郡寧還國悉
發兵二十餘萬起鄭綏將而攻圍海陽一月登
庸固守不下而別選兵萬餘舟行出大江竟掩
都門寧錯愕走清華登庸掠庫藏及張世子旗
蓋而還呼曰得王矣鄭綏兵大潰壞散奔久之
寧復悉清華兵討登庸相拒不決登庸陰結土
帥郭遼鶴使襲寧復大敗九年登庸遂僭稱大

上皇帝子方瀛爲國大王改號曰大正拜其腹
心臣裴堵爲丞相填海陽武護爲西軍都督填
山西阮如桂爲北軍都督填京北阮伯驪爲南
都督杜世卿軍爲東軍都督俱填山南阮立爲
總太監填河北太監阮世恩中軍都督楊金鑣
兵師范嘉謨禮部尚書阮時雍苦執朝政十六
年明皇太子生詔遣使告禮部尚書言言前往
諭不達究所由未報詔促報而世子寧間道使
陪臣鄭惟猷來乞師而宣光總兵使武文淵左

都督黃明哲等各據地請內應當是時天子銳
意討登庸群臣諫不聽亡何登庸使所親杜文
莊來覘我師獲之文莊言方瀛都黎王故京有
精兵肆萬人戰象百舞象五馬五百疋舟五百
艘而登庸出填都齋無城四圍鉄力木作排柵
兵可五萬人象馬及舟如前而又言登庸六十
餘矣騎捷不施衙勒所有國土十八黎王僅得
清華數郡藉占城援耳魯使其大帥譚百步以
兵三萬來討大敗失百餘艘而去詔下文莊獄

而使兩廣滇蜀諸鎮整兵待登庸聞之惧使使以地圖人民藉來獻請委國附然實無意特緩我師耳詔不許拜威寧侯仇鸞爲征夷將軍兵部尚書毛伯溫叅贊軍事得專生殺征蠻將軍安遠侯柳珣兼征夷副將軍兵部侍郎蔡經以二廣兵合征南將軍黔國公沐朝輔以雲南兵合凡三十萬人壓境登庸來言願得東身自投請決死尚書伯溫與左叅政翁萬達計今兵食非能加我太宗時也不許而深入勝則可萬一

負當壞散不振爲中國耻遂開軍門見之解縛待以禮而彼此俱盛戒不得發登庸上表進代身金人贖罪仍請封詔拜爲安南都統秩二品銀印兵遂罷歸尚書伯溫等以功進秩有差而登庸遂急擊滅黎王矣登庸死子方瀛嗣貢不絕

論曰西南夷君長以十數安南爲最鉅地抵中國得十一戶口得十二漢置九郡後共賦稅出力比於中土焉人物如阮翁仲姜公輔輩皆自

奮勵起爲將相有聲至宋始弃以畀其酋然猶授王官質子貢物饒富不敢妄異同也宋弱漸以恩寵縻其逸彼益驕不復覩中國大矣元得志直北際萬里不譯而通欲脩漢舊累發兵伐之三四入國都終靡要領當是時東南吏士物故者十餘萬轉漕饋餉之費不可貲計更遣使好喻數彼巧據厚幣陽餌而陰扞焉大都之闕庭終不可望其世子之跡迨明太宗文皇帝拜征夷將軍大發兵討之擒僞王伏斧鑕闕下

畫經界置吏受約束夷樂夷俗畏恐明法峻旋叛雖得屬圖版之末二十餘年大司農量得喪乃百不當一耳宣皇帝難用兵采楊士奇楊榮議罷之南土稍息肩然交州均迄今云

洪武時傅將軍下雲南得大理郡大理古六詔唐時勝兵近百萬與中國抗幾併蜀今彬彬然內郡無慮矣用兵等耳豈善後之策異耶非耶國家地羸於交州而取奇大理稍相折然去漢唐時間矣建議者非不蘄津津復也往年莫氏

之役興獨 主上銳而群尼之此豈偷佚忘大
哉善理疾者必先究吭領要害而餘功建於肢
節虜勢方跳梁歲殺掠吏士孤不得壯壯不得
老而供餉坐疲矣舍吭領要害之究而事肢節
非有大益且有異害昔吳王北破齊盟晉而越
入吳王且未慮吳也而欲伐宋其臣諫曰王得
宋小不能居而失吳王乃歸此征安南之說也
伐宋非失策也吳固而後宋可伐也

鳳洲筆記卷之十八

鳳洲筆記卷之十九

海虞文臺黃美中校

雜編一

鳳陽

國初欲都之不就今為中都留守司城周三十
里門九正南曰洪武南之左曰南左甲第右曰
前右甲第北之東曰北左甲第西曰後右甲第
正東曰獨山東之左曰長春右曰朝陽正西曰
塗山

南京

京城周四十六里門十三南曰正陽南之西曰
通濟又西曰聚寶西南曰三山曰石城北曰太
平北之西曰神策曰金川曰鍾阜東曰朝陽西
曰清涼西之北曰定淮曰儀鳳後鍾儀二門塞
外城周百八十里門十六麒麟曰仙鶴曰姚坊
曰高橋曰滄波曰雙橋曰夾岡曰上方曰鳳臺
曰大駟象曰大安德曰小安德曰江東曰佛寧
曰上元曰觀音

北京

京城四十里凡九門正南曰正陽南之左曰崇
文右曰宣武北之東曰安定西曰德勝東之南
曰朝陽北曰東直西之南曰阜成北曰西直

偶於戶部覆疏見近來邊費之詳錄於
此

查邊錢糧原額二項民糧出自各省起運屯糧
出自衛軍國初三分守城七分屯種歲入之後
利尤無窮至如馬芻亦止給採青收放所以其

時隨在各足邊糧常勾防秋數支用直至正德
末年通計各邊年例猶止銀四十三萬內宣府
十萬兩大同五萬兩遼東十五萬兩延綏三萬
兩寧夏四萬兩甘肅陸萬兩今本部歲派山西
等布政司直隸河間等府起運宣府糧料五十
四萬七千五百二十五石布一十八萬九十六
百一十八疋綿花絨三萬七千五百斤馬草七
十萬束大同糧料三十八萬七千四百七十五
石布一十八萬三千五百疋綿花絨八萬斤馬

草二百四十四萬八千五百五十束二分八釐
山西寧武關糧料九萬七千石馬草一百一十
萬束遼東麥米折布三十二萬石綿花絨鈔一
百九十三萬二千二百四十五斤錠馬草二十
二萬三千五百六十三束銀一萬七千三百九
十七兩四錢二分一釐固原糧料二十二萬五
千四百四十九石九斗馬草二十八萬三千二
百三十六束延綏糧料三十二萬一千二百八
十五石九斗九升馬草五十五萬二千八十六

東布四萬疋寧夏糧料一十四萬三千八百五
石四斗馬草一十六萬一千二百四十束甘肅
糧料二十一萬七千八百八十一石四斗薊州
糧料三萬五千一百八十八石麥折布一萬二
千二百七十一疋馬草一百萬束昌平糧料布
花淮米麥一十三萬一千五百七十五石二斗
馬草八十五萬六千一百束密雲糧料一十三
萬八千六百二十石易州糧料三十一萬六千
三百八十八石綿花布五萬一千六百八十八

疋綿花絨二萬四千九百七十斤八兩馬草一
十一萬七千束屯田原額宣府屯軍八千六百
七名屯地四千三百三頃五十畝各色子粒二
十五萬四千三百四十四石三斗一升大同屯
軍一萬六千七百名屯地一萬五千八百三十
頃各色子粒五十一萬三千九百四石五斗五
升山西屯軍九千四百九十名屯地陸千一百
一十二頃一十畝各色子粒二十五萬七千七
百四十六石五斗五升遼東中軍四萬五千四

百五名屯地二萬五千三百七十八頃二十八
畝額糧七十一萬六千一百七十石以後歲徵
四十伍萬四千石固原延綏二鎮屯軍舍人二
萬六千七百二十八石屯地二萬六千一百一
十八頃二十一畝各色子粒三十六萬伍千一
百四十石伍斗四升六合寧夏屯軍一萬一千
一名屯地五千五百二十七頃九十二畝五分
各色子粒三十二萬二千七百二十二石二斗
七升九合四勺比肅屯軍二萬三千三百八十

三名屯地一萬一千六百九十一頃五十畝各
色子粒陸十萬三千一百八十八石四斗二升
五合薊州屯軍伍千八百七十五名屯地二千
八百二十八頃五十一畝細糧陸萬八千伍百
陸十七石五斗九升拾數年並無一處通關奏
繳而宣大延綏七廢尤甚嘉靖二十八年一年
延綏一鎮發銀至二十九萬一千四百七十七
兩加以宣府銀八萬兩大同二十二萬四千二
百五十三兩山西廣武等站一十六萬八千九

百九十四兩遼東十五萬兩薊州三萬兩固原
五萬八千八百二十兩寧夏四萬兩甘肅六萬
兩謂之年例宣府一十一萬五千六百四十四
兩大同伍萬四千五百兩山西五萬八千七百
四十三兩遼東四萬一千一百五十四兩固原
三萬兩寧夏八萬七千九百九十九兩甘肅一
十萬二千一百五十九兩謂之補不敷大同六萬
三千二百陸十九兩遼東三萬二千二百兩甘
肅二萬兩謂之募兵糧宣府四萬大同七萬兩
謂之預備宣大三十四萬四千五百八十四兩
大同二十六萬兩山西七萬兩密雲易州昌平
十八萬四千兩寧夏一萬兩謂之防秋宣大
四
十萬八千四十六兩謂之脩邊京營宣大等處
七萬二千五百二十一兩謂之賞賜

會典戴畚貨價值偶附記於此

胡椒每斤鈔三貫丁香每斤一貫萆菱每斤二
貫速香每斤二貫木香每斤三貫乳香每斤五
貫蘇木每斤五百文黃蠟每斤五百文油紅布

每段一貫五百文青布每段一貫五百文玳瑁
盒每箇一貫玳瑁盃每箇一貫藤竭表裏每斤
一貫沒藥每斤五貫金銀香每斤五百文大楓
子每斤一百文錫每斤五百文苾布每疋一十
五貫肉荳蔻每斤伍百文古刺水內大合一貫
小合五百文荳蔻花每斤伍百文腰刀每把三
貫鐵每斤三百文花布每段一貫大花手巾每
條二貫小花手巾每條一貫一應各樣粗布每
段一貫沉香每斤三貫黃熟香每斤一貫葦澄

笊每斤一貫翠毛每斤三百文烏爹泥每斤五
百文紅紋節知被每條五貫塩每斤一百文梔
子花每斤一貫丁皮每斤五百文悶虫藥每斤
二百文象牙每斤伍百文花氈单每條一十貫
撒哈喇每疋一百貫珊瑚枝每斤三十貫血竭
每斤一十五貫龍涎香每兩三貫蘇合油每斤
三貫大玻璃甌每箇三貫小玻璃甌每箇二貫
大小玻璃碗各同玻璃燈甌一箇二貫鶴項每
箇二貫赤金每兩伍十貫足色銀每兩十五貫

降真香每斤五百文妥剔牙每斤一貫膽礬每斤二貫回回石青每斤一貫珊瑚珠每兩二貫烏木每斤五百文安息香每斤伍百文紫檀每斤五百文木鼈子每斤三百文雄黃每斤五百文阿魏每斤二貫堯羅彼每段十五貫絲手巾每條二貫粟米珠每兩五貫油血石每兩二貫番砂每斤二百文夕牙吸答納每斤五百文八的阿納每斤四百文三額阿刺必每斤五百文別模刺每斤五百文厥枯露每斤三百文加定

每斤五百文哈都味思每斤五百文阿思達摸塗兒氣每斤五百文暗花打布每段一貫沙連布每段一貫查青禮布每段一貫加籠冑布每段一貫烏連布每段一貫勿那朱布每段一貫蘇麻達每斤二百文番弓每張二貫番箭每枝一百文

南京守備協同叅贊坐次

正統中襄城伯李隆正中坐戶部黃少保福左側坐公退左右對坐少保卒兵部徐侍郎左側

坐襄城去豐城侯李賢代徐侍郎陞尚書仍左側坐都督趙倫協同地平下左側坐後革靖遠伯王驥代徐尚書為總督與豐城分左右正坐靖遠左寧遠伯任禮代豐城仍在右靖遠伯還朝徐尚書復來杜侍郎寧始推尚書與寧遠分左右正坐張右都純監督操軍不預守備事下教塲與徐尚書分左右正坐張都御史在左趙都督仍舊坐戶部張尚書鳳來右邊稍偏正坐戶部沒張都御史陞兵部尚書叅贊右邊正坐

寧遠告老平江伯陳豫代與張尚書仍分左右坐平江去張尚書致仕魏國公徐顯宗代平江獨正中坐鎮遠侯顧協同右邊稍偏正坐兵部蕭尚書維禎叅贊鎮遠坐左魏國鎮遠俱沒蕭尚書獨右偏正坐成國公朱儀代魏國如魏國坐兵部李尚書賓來如蕭坐馬都督良協同地平上右側坐李尚書馬都督皆還朝兵部程尚書信來如李坐後添設泰寧侯陳經協同與程尚書分左右正坐泰寧左泰寧漕運定西侯蔣

琬代如泰寧坐程尚書去吏部崔尚書如程坐
崔尚書去左都御史王恕來尋陞兵部尚書如
崔坐定西侯還朝新寧伯譚祐代如定西侯王
尚書巡撫兵部薛尚書遠來如王坐新寧還朝
太子太保豐城侯李勇代如新寧坐薛尚書歸
陳尚書俊坐如薛已後守備參贊坐大約相同
惟增內守備太監據首席而協同者爲侯伯則
上坐都督則側坐耳

考察之法

成化中用吏部尚書李裕言外官考察自貪酷
老疾罷軟之外復設才力不及對品改調別省
嘉靖間用吏部言才力不及外官調用俱降一
級

御史言劉瑾奸黨

正德庚午劉瑾伏誅給事御史言奸黨二十八
人大學士曹元吏部尚書張綏戶部尚書劉璣
兵部右侍郎陳震南京禮部尚書朱恩都御史
魏訥楊武劉聰徐以貞翰林院脩撰康海侍讀

焦黃中編脩劉仁大理寺少卿董恬太常寺少卿劉介去任司務孫聰都給事中李憲捕盜御史薛鳳鳴員外改御史朱袞河南僉事白思誠叅議王欽掌真定府叅政楊儀順慶知府莊禪徽州知府楊孟瑛吏部郎中王九思王納誨得旨綵已逮問曹元劉聰恬海禪訥武鳳鳴孫聰儀思誠思英欽介孟瑛黃中仁等俱為民徐以貞袞九思納誨降二級俱調外任璣已致仕已

御史復交奏

致仕大學士焦芳劉宇去任侍郎韓福見任兵部尚書王敞通政吳鈇南京工部尚書李善都御史屈直刑部右侍郎張子麟南京太僕寺卿王彥奇工部右侍郎胡諒丁夔都御史馬炳然南京戶部尚書張灤南京禮部右侍郎常麟都御史秦昂趙扣左布政潘楷按察使張禎仲本順天府丞石祿檢討段炅主事侯自明員外郎徐聰寺丞紀世梁御史宇文鍾副使閻絜郎中高選得旨王敞鈇炳然子麟灤麟等仍留用

李善屈直彥奇諒俱致仕秦昂扣聰世梁俱閒
住潘楷禎鍾皆爲民石祿仲本降三級閻紱高
選降二級侯自明段炅對品調外任

有兼掌文武二印者

正統中尚書楊善以興濟伯掌左軍都督府兼
禮部事成化中湖廣左布政使陶魯兼廣東按
察副使正德中江西右布政使吳廷舉兼按察
副使嘉靖中山西右叅政王輪兼按察僉事

太常翰林告改教授

錢唐王羽以太常少卿告改本府教授永樂乙
未進士第二人李貞第三人陳景著俱以翰林
修撰告改貞得高州景著得福州俱教授

外任改翰林京秩

永樂庚寅許州知州潘文奎以事當降爲有文
學改左春坊司直郎乙未按察僉事言蘄州同
知桂宗儒柔懦當黜以任淺問刑都察院三載
擢翰林院修撰宣德丙午吏部言四川按察使
陳璉不諳憲法改通政使掌南京國子監

翰林書散階于職下

文臣署官俱書散階於職銜之上惟翰林書於下或云始自文皇時不然也觀遼金史知元時亦然矣

上幸妖妓

景帝時召妖妓李惜兒入宮武宗時狎晉陽妓劉氏號劉娘娘

櫛工皂隸至二三品

以櫛工至太常卿者洪尚觀也以皂隸至布政

使者蔡春王興宗也

一部二尚書管事

宣德初吏部蹇義郭璉戶部夏原吉郭資又郭敦正統吏部王直何文淵又王翱禮部胡濙楊寧兵部于謙儀銘工部江淵石璞嘉靖兵部張瓚樊繼祖工部林庭楫甘為霖

元遺諸臣

傳曰楚雖有才晉實用之夫興國之取亡國之遺也勝棋之着敗碁之弃也元不能識拔

劉誠意輩困之下僚以遺我 太祖雖欲不
亡烏可得耶諸君子弃夷就夏滌垢向新或
至叅謀猷議政事縮史筆盛哉首陽之風遠
矣彼受勝國顯爵祿如危素輩又其下者武
弁則奚誅焉吾不錄錄文臣

元翰林學士承旨危素改弘文館學士治書侍
御史秦從龍未任翰林侍講學士張以寧王時
刑部侍郎程儒漢學士承旨詹同俱仍原職羅
復仁為弘文館學士總管府判劉基見前李善

為燕府紀善戶部尚書張杲改中書叅政山東
行省左丞安然樞密同知朱守仁改工部尚書
樞密同僉李質改刑部尚書禮部員外郎魯堅
改本部侍郎主事蕭肅改工部侍郎翰林編修
宋濂改承旨答祿與權改侍講國子助教王僕
改待制儒學提舉劉三吾改學士

壬午諸臣

壬午之變方孝孺鈇鉉諸君子烈哉然論者
多以死事許齊黃而以不死罪楊解非也建

文 文皇帝從子也非疆敵世讎者比喪君
有君伊何殉之齊泰黃子澄其所密勿獻替
之臣爲侵削計者也降亦死不降亦死死等
耳楊解二君子秩甚微僅一審理待詔易處
也委曲以全其宗引避以全其志不亦快然
幾中道哉乃大用得亡過矣今錄其著者

兵部尚書茹瑞戶部尚書王鈍吏部右侍郎蹇
義戶部右侍郎夏原吉工部右侍郎黃福工部
尚書嚴震直戶部尚書古朴工部尚書鄭賜戶

部尚書郁新兵部左侍郎劉儁工部左侍郎張
思恭禮部左侍郎王達翰林學士董倫翰林學
士王景侍讀學士陳洽吏部郎中胡廣翰林脩
撰楊榮中書舍人黃淮待詔解縉審錄楊士奇
已謫而後用者工部右侍郎張顯宗大理寺卿
薛嵩

用印之異

皇后東宮各王府俱用金寶東南諸國俱用鍍
金銀印其朝鮮日本淳泥國王哈密忠順王瓦

刺西番王俱金印宗人府五府六部都察院各
都司布政司衍聖公張真人用銀印應順天府
三品亦銀印文淵閣五品亦銀印印特小用玉
筋篆掛印總兵用銀印柳葉篆永樂間灌頂國
師烏思藏闡化王用玉印螭紐金匣龍袂

賜夷狄姓名

太宗時夷狄來歸者為賜姓名然不冒以國姓
如忠勇王也先土干曰金忠安順侯脫火赤曰
薛貴清平侯買驢曰吳成都督把都帖木兒曰

吳允誠倫都兒灰曰柴秉誠都指揮僉事把住
曰楊效誠朶兒只曰馬惟良鐵住曰柴克恭行
都指揮同知滿束兒灰曰柴志誠都指揮僉事
阿兒刺台曰楊汝誠指揮使伯帖木兒曰柴志
敬指揮同知猛歌曰安汝敬僉事脫脫曰楊必
敬只蘭曰吳克誠朶列子曰吳存敬火失答曰
韓以謙祖住不花曰柴永謙

安南僞官見張輔所上表

僞大虞國上皇黎季犁季犁子僞大虞國主黎

蒼推誠守正翊贊弘化功臣雲屯鎮兼歸化等
鎮諸軍節度大使洮江管內觀察處置等使持
節雲屯歸化嘉興等鎮諸軍軍領東路天長等
路大都督府特進開府儀同三司入內檢校左
相國平章軍國事上柱國賜紫金魚袋衛國大
王黎澄僞太原鎮兼天開鎮節度大使驃騎上
將梁國王黎 新安鎮節度大使驃騎上將軍
新興郡王黎孫太子黎芮僞郡嗣王黎涵郡亞
王黎蒞幼孫五郎弟臨安鎮兼大安海鎮驃騎

將軍特進開府儀同三司入內右相國平章事
賜紫金魚袋上柱國唐林郡王黎季貽從子望
江鎮輔國大將軍入內判中都督河陽郡亞公
黎原咎領龍興路都統府平陸縣上侯黎子綽
從孫御輦局正堂卿侯黎叔爌清亭侯黎伯駿
石塘卿侯黎廷燁永祿卿侯黎廷爌將僞入內
僉聞朝政兼內侍省都知知左班事諒山鎮僉
行軍行諒江路同知總管府事賜紫金魚袋柱
國東山鄉侯胡杜入內行遣同知尚書左司事

樞密院副使阮光正奉大夫入內行遣門下左
諫議大夫同中書公事兼三江路太守新安鎮
討置使國子學祭酒賜紫金魚袋護軍黎景琦
寧衛大將軍知威衛營左登翊軍賜金團符縣
伯段輦神勁營高伯陳湯鈞鈴衛中郎將領龍
捷軍兼領壯勇營范六材嘉靖中莫登庸莫試
上將征之其國人鄭惟僚供稱僞丞相臨國公
武護督山西地方守明光興化等處北軍都督
申國公督京北地方守諒山等處南軍都督鎮

國公阮伯驪東軍都督麟國公杜世卿分督山
南地方守本國世孫攻出等處總太監廣國公
阮立撰督北河府守太原等處中軍大都督端
國公楊金鏤總太監太國公阮世恩兵師海國
公視朝不拜范嘉謨禮部尚書良國公阮時雍

朝鮮使臣

嘉靖辛亥秋習儀朝天宮見朝鮮使臣任虎臣
問其年四十五爲刑曹簽判猶中國刑部侍郎
也秩從二品中辛卯進士授翰林應奉擢世子

說書累遷觀察使京兆尹以至今官因言其國
三歲一開科取子午卯酉初場試經義論二場
表誥二場賦策壬午狀元姜崇德故乙酉沈光
彥為吏曹僉判戊子鄭希顏故辛卯金忠烈為
知府甲午金希聖故丁酉尹鉉庚子金允鼎癸
卯盧守慎丙午沈守慶為吏禮各部郎中巳酉
閔時中為吏部主事其左右議政一品六曹判
書正二品左右僉判從二品觀察使凡八道
鳳洲筆記卷之十九

鳳洲筆記卷之二十

海虞文臺黃羨中校

雜編二

宣宗朝寧王權上書

臣切念

祖宗積德之厚

父皇創業之艱立法垂訓以傳萬世錫子孫保
全之福為

宗室久安之計宣德元年八月江西布政使

移文謂

太祖高皇帝子孫以祿米定品級臣不勝誠恐
惶懼伏惟

祖訓所載祿米蓋親親次序無有品級誠以子
孫皆

祖宗一氣之分不與異姓同至今四代乃定品
級臣恐萬世之下謂自今日始也昔

父皇在位時靖江府將軍比正支減一等亦無
比品凡朝賀祭朝皆與諸王同班惟駙馬儀

賓有比品駙馬比從一品而冠服與侯同班
列侯下郡君儀賓比從四品常服亦用麒麟
玉帶班列都督之前蓋亦以至親不以品級
論也又

父皇嘗謂靖江世子兄弟做將軍俱異姓相見
還行君臣禮其衣服且着穿素二十年後諸
孫有冠者袍用四爪龍冠用唐帽蓋不與外
人同也今定品級則列外官之下
聖子神孫皆

祖宗遺體臣不避斧鉞之誅干冒
天聽伏望赦免誠

宗廟之福骨肉之幸也

宣宗復寧王書

承喻以祿米定品級非舊制忿切之情溢於
言表再三披閱駭愕良深蓋事有非然理明
白所言

太祖高皇帝子孫舊無品級之說今考

祖訓錄內凡郡王之子授鎮國將軍三品孫輔

國將軍四品曾孫奉國將軍五品玄孫鎮國
將軍中尉六品五世孫輔國中尉七品六世
孫以下世授奉國中尉八品是郡王子孫本
嘗無品級也又云靖江王王將軍比正支迤
減一等亦無比品凡賀朝祭廟皆與諸王同
班必若此言則諸王兄弟子姪同為行列是
無尊卑之分曷為而可又云

太祖高皇帝於郡王儀賓比從四品常服用麒麟
玉帶班列都督前蓋以親親不論品級今

考

祖訓錄

皇明祖訓皆無明文可稽今之所云未審載于何典禮也又云

高皇帝嘗謂靖江世子兄弟做將軍衣裳且着穿素而郡君儀賓既比從四品則今用麒麟玉帶如此即是抑族屬而重外親疏戚倒置於禮可乎如此又云

高皇帝靖江世子兄弟做將軍但是異姓相見

還行君臣禮今考

祖訓錄

皇明祖訓及禮制並無明文可徵但有洪武二十九年十二月欽定靖江王庶子鎮國將軍與王相見禮儀云鎮國將軍凡與駙馬儀賓公侯相見將軍居左駙馬等居右皆再拜與文武官一品至三品相見將軍居中各官拜將軍答拜與四品以下官相見各官拜將軍坐受凡遇將軍於道駙馬儀賓公侯讓左並

行文武一品至三品引馬側立四品以下者
下馬九傳其曰鎮國將軍裔皆稱呼之曰官
人有此明著而別無行君臣禮之說若必如
所云行君臣禮是教子孫越禮犯分不知有
君矣且群臣於靖江府將軍皆前行君臣之
禮是天下紛紛多君也春秋之法天無二日
土無二王家無二主聖人之道尊尊親親各
有攸當故知此語已矣決非

太祖高皇帝所言今郡王庶子以下品級則載

於

祖訓錄靖江府將軍群下相見之禮則載於洪
武二十九年欽定禮儀比皆

太祖高皇帝所制以垂範子孫臣民所慮者甚
遠所定者甚精皆非一朝一夕之所成也至
洪武三十五年八月

太宗皇帝臨御之禮時即令禮部申明舊制行
此數事

太宗皇帝當時見

祖訓錄內鎮國將軍等品級與歲祿不進遂加
鎮國將軍從一品輔國將軍從二奉國將軍
從三品鎮國中尉從四品輔國中尉從五品
奉國中尉從六品今行之有二十八年矣予
自嗣位以來盡其恭禮

祖宗之心恭循

祖宗之法非敢毫末有所增損况於諸叔祖諸
叔及諸兄弟上念

祖宗之重親親之意未嘗敢薄亦未嘗輒有拂

逆之事往者逆賊高照在

太宗文皇帝時屢造大罪及予嗣位加厚待之而

包藏禍心終謀不軌然求

朝廷之過未得輒妄稱

太祖高皇帝時未嘗頒給郡臣誥勅以為擅改
舊制具本指斥遂舉兵反及被執至京出洪
武中諸司職掌示之逆照俛首無言悔愧不
及今叔祖輒有不避斧鉞乞為赦免之說

宗廟神靈鑒臨在上何冤何抑而恨忿不平予

覽畢以示公侯伯五府六部文武大臣咸謂
叔祖意非在此蓋記此為名耳不然何以宣
德元年八月之事而至今始發也予已悉拒
群臣之言不聽尚望謹之或復不謹非獨群
臣有言不巳是時予雖欲全親親之義有未
易能故必陳本末惟叔祖虚心聽察庶幾羣
臣之分定尊卑之序明而所議品級又何繫
於輕重何乖於禮法哉若以謂族屬之長必
誣執為

朝廷之過天理人心不可罔也惟
叔祖亮之

燕王與曹國公李景隆戰書

覽書知無恙甚喜但書詞何其虛誕矯飾而
矜高誇大也夫言貴以誠事貴論理誠斯無
往不孚理斯無往不服予

太祖高皇帝之子汝

太祖高皇帝之甥至親也吾所為是非曲直上
有

天地有

宗廟神明昭鑒之下有群臣有一國軍民共見之而至親乃不見不知可乎大抵今日之事為權奸之勢所脅雖

天子尚在其掌握凡是非邪正瞭然明白者皆移易變置以眩惑之自

天子以下惟其言之聽生殺予奪惟其所惡欲予素不能諂事權奸故今日必欲見害雖

天子不能不從之爾亦不免為所驅迫者屈於

其勢而已之力不足也若汝之心彼固不能迫而昏之也今反覆來書是汝心亦為所昏乎何其虛誕矯飾而無誠矜高誇大而無理歟權奸所指予罪凡八其六事皆予遵承祖訓而行

皇考之世者何圖今日反以為罪乎其一謂第二子高照擅笞驛吏是其過矣而遂指為其父之不軌其亦可以服人乎其一一謂予招納異人術士此尤其是茫無聲影凌虛駕誕之說

天地鬼神其可欺乎以此而輒加極惡大罪勢
厭威迫將戕其一家權奸所為毒切如此故
自救之計不容已也爾今言息兵固上合
天心下合人心矣然當明兵禍實始於誰明其
所始而一言以弭之孰不欣願而凡事有本
有末為之必自其本庶幾可成今權奸肇兵
兵禍之本也誠欲弭兵必自去權奸始權奸
去則

朝廷清明則上下之情通則兵不待言而自弭

矣汝不思此而但盛稱謀臣之精勇士之衆
甲馬之富疆傲自矜大以為泰山壓鷄子之
勢此固權奸所恃以肇禍者而汝亦同之汝
亦愚矣哉夫區區北平一隅之衆不足以當
天下之力三尺童子知其然也然師行有以
忠為勇以義為壯以行而勝者亦有恃衆而
覆好驕而敗者初不係人之衆寡力之強弱
也况今天下謀臣勇將素受

皇考之恩而於今嫉權奸之跋扈憫

宗室之無辜所在有之故臨戰之際倒戈來
歸已數萬人雖却之不納遣之不去助謀効
力翕然同心吾何足以得此哉蓋忠義之心
人人所同則汝所多然以自矜大者又可終
恃乎此蓋因汝誇詐聊爲言之然不足深辯
但當推誠以明今日之事理夫吾所欲去者
惟奸臣齊泰黃子澄數輩耳去之而使綱紀
政令一出於
天子朝廷清肅

宗社莫安悉復

皇考之舊即歸守藩屏永祗臣職非敢萌分毫
踰分之望此吾之誠心也如固匿權奸不去
禍本而惟欲散吾之衆豈獨吾心所不能從
將士忠義之憤其肯從乎懇懇之心惟在如
此前嘗兩奏書於朝敷訴中悃悉不賜答此
必奸臣慮非已利邀截蔽匿不以上聞今備
錄徃汝觀之如汝不惑於權奸之所迫而能
篤念我

皇考之大德

宗社之大計以及予至親之誼則以密聞於朝廷違予之誠於上聽上處之若汝惟知有奸臣不復他念即無益之書繼今宜絕遂以兵刃見加予亦不得而辭避矣其亮之

書復

太上皇 弟御名再拜復書 大兄皇帝陛下

邇因 大兄以保

宗廟

社稷之故率師巡邊不幸被畱邊庭自

聖母皇太后以及弟與群臣不勝痛恨我。

皇太后復念

宗社臣民無主已立 大兄皇庶長子為

皇太子布告天下以繫人心以待 大兄駕回

柰何日久

宗廟缺祀 國家無主我

皇太后及宗親諸王皆統率人馬赴京衛護

宗社同念 太子年幼不能親理 國事臣

民無望命弟即

皇帝位以慰輿情在廟公侯駙馬伯及文武群
臣萬姓亦合辭請早定大計又使臣回亦傳
大兄之命令弟主典

宗廟之祭弟不得已受命主宰天下尊

大兄爲太上皇帝弟身雖已如此心實痛恨
不已仰望 大兄早旋誠弟千萬幸也近得
賜書捧讀再三且喜且痛若太師也先果欲
送 兄回是能上順

天道下順人心真大丈夫所爲豈不名揚千古
大兄到京之日君位之事誠如所言另再籌
畫兄弟之間無有不可何分彼此但恐降尊
就卑有違

天道望 大兄與也先太師言之送 兄回國

不必多遣人馬恐各王軍馬在京衆大勢有
相犯不能目已非弟所能保無恙也只宜用
五七騎送來即可以全和好伏望
大兄深念

祖宗

社稷生靈為重善為之辭

天地鬼神必加保佑臨楮惓惓不勝痛恨伏惟
大兄亮之

正統十四年九月二十日

書與太師也先

皇帝書復

太師也先

使臣來得

太師致

書欲遣使送

大兄太上皇帝回京足見

太師上順

天道之心比先朝廷與太師處皆因下人之
言彼此都動軍馬我朝廷為奸邪所誤以致
一時生靈受害太師又念兩家自
祖宗來和好之情救護人民足見下順人心之
意大抵古今之人能順

天道合人心者無不長遠享福此是一定不易
之理先因朕兄不知存否國家無主宗室諸
王統率天下軍馬皆來保護

宗社我

聖母皇太后及王公侯伯并臣民皆言自古生靈不可一日無主朕當嗣位主宰天下又得指揮岳謙梁貴回京口傳大兄皇帝聖旨命朕嗣位以典

宗廟之祀朕不得已勉遵大命敬順

天道人心奏告

天地

宗廟

社稷詔告天下即皇帝位尊大兄為太上皇

帝尊居朕上太師果能送兄回京朕有

大事必當稟命而行若大兄仍居皇帝位

則為降尊就卑是罔

天矣罔

天之事朕豈敢為太師必同此心朕謂

太師送兄回京以全和好真大丈夫所為

古今少有豈不使好聲名播揚千古但今各

處軍馬皆來聚集京師保護

宗社布列遠近太師宜少遣數十人送朕

兄回京庶幾衆軍之心不疑不至相犯尤見
太師保全和好之盛心也往事彼此俱勿畱
意須去禮物至可收領惟 太師亮之

書與岷王等

皇帝書奉 曾叔祖岷王 茲者虜寇乘機入
關肆為劫掠侵犯京城危急之秋尚賴

曾叔祖宗室至親念以

宗社為重命將統率精兵不拘多寡星馳赴京
勤王以除虜寇以安國家期在旬月畢集會

合懸望懸望仍自鎮靜固守藩疆專此奉達
惟 曾叔祖亮之

正統十四年十月十五日

叔祖周王

叔祖魯王

叔祖蜀王

叔祖肅王

叔祖遼王

叔祖慶王

叔祖潘土

叔祖唐王

叔祖伊王

叔趙王

叔鄭王

叔襄王

叔荆王

叔秦王

叔楚王

叔代王

叔韓王

叔寧王

弟晉王

弟淮王

Large stylized watermark or seal, possibly reading '圖書' (Library/Books).

Vertical text on the right edge, likely a page or volume number, including characters like '卷' (Volume) and '第' (Number).

